

## Der bucklerte Moh

T.u.M.: Philipp Zurek (Urheberrechte beachten!)

1. Bei uns im Haus unterm Dach wohnt a bucklerter Moh!  
Hodd Hoa af da Nohsn und immer den gleichn graua Kiedl oh!  
Die Leid, die sohng, er is a grimmineller Spinnä!  
Die Leid, die sohng, er fresserd glaane Kinner!

Nochds spazierda aufm Dach umanannnd,  
sommambul, a olds Foddo in da Hand.

Mid seim weißn Schlohfonnzuch schauder beinoh wie a Dohder aus,  
und aus seim Mund kummd onngeblich a Gschdank wie Mohder raus,  
sohchd jednfalls da Ongl Willi,

und da Willi, der hodd rechd, wall da Willi khaffd ma jedn Freidoch ann Leberkees, er sochd:  
„Geh nedd noh zum bucklerdn Moh, wall sunnsd zauberder dir sein Buggl noh,  
su schnell schausd du goa nedd mei Bu!

2. Neili sochd mei Mudder: „Häng die Wäsch omm Speicher auf!“  
Mid ziddriche Gnie schdeich ich die Drebbm nauf.  
Underweechs aus Väsähng onn sei Wohnungsdüa hieschdraaf.  
Und scho gehd die Düa midd am furchdboarn Gnarzn auf.

Und mei Herz bleibd aff amoll schdee voa Schregg,  
zum Weglaufm woas eds scho vyll zu schbäd.  
Und irgndwo undn auf da Schdross hodd a Hund gebelld,  
und da Bucklerte schaud mi finsder oh und sochd:

„Kumm mid rei, Alter, dring ann Kaffee mid miä!“  
Ja und dann ziehder mich vollständig nei zu seiner Düa,  
und iech sids in seiner Kichn omm Diesch.

Und er erzylld vo dem Unfall voa viä Joa,  
aff ahmoll woa für ihn alles goa,  
blichm is der Buggl und a old Foddografie, ...  
„su schnell schausd du goa nedd, mei Bu!“

3. Schbäda in der Nacht simmer dann nuch naus aufs Dach,  
der Blick is weid, mid Aussicht ieber die ganse Stadt.  
Do ohm wird die Kubf langsam leer und frei,  
und ärcherzwann scheidt sogoaf af der Leid ihr Gschrei.

Da Ongl Willi schaud vo doh ohm gans glaa und bucklert aus.  
Er schiddld mimm Kubf und reissd im Vorgaddn weider Ungraud raus.

Doch iech geh eds immer zum Franzek in die Dachkammer nauf,  
und omm Wochnend machen mir do ohm einen drauf,  
su schnell schausd du goa nedd, mei Buu.

Und omm End hoggma draußn aufm Dach,  
do komma su schee a Zigareddn raach,  
do ohm homma Friedn und Ruh,  
vo do ohm schaua mir eds Eich - beim Buggln zu!